

LIGJ Nr. 140/2015 date 17.12.2015

PËR DISA SHTESA DHE NDRYSHIME NË LIGJIN NR. 61/2012, “PËR AKCIZAT NË REPUBLIKËN E SHQIPËRISË”, TË NDRYSHUAR

Në mbështetje të neneve 78, 83, pika 1, dhe 155 të Kushtetutës, me propozimin e Këshillit të Ministrave,

KUVENDI I REPUBLIKËS SË SHQIPËRISË

VENDOSI:

Në ligjin nr. 61/2012, “Për akcizat në Republikën e Shqipërisë”, të ndryshuar, bëhen këto shtesa dhe ndryshime:

Neni 1

Në nenin 14 bëhen këto ndryshime:

1. Në pikën 1, shkronja “dh” riformulohet si më poshtë:

“dh) Për biokarburantet që përdoren në sektorin e transportit, në masën e përcaktuar në ligjin nr. 9876, datë 14.2.2008, “Për prodhimin, transportimin dhe tregtimin e biokarburanteve dhe lëndëve të tjera djegëse, të rinovueshme, për transport”, të ndryshuar, vetëm për vlerën e detyrimit të akcizës së paguar, që i korrespondon sasisë së produktit “BIO” të gjendur në produktin e deklaruar për konsum, pas konfirmimit nga Laboratori Kimik Doganor. Procedurat dhe kriteret e rimbursimit përcaktohen me vendim të Këshillit të Ministrave”.

2. Pas pikës 2 shtohet pika 3 me këtë përmbajtje:

“3. Akciza nuk rimbursohet për nënproduktet e naftës të përdorura për nevojat e veta nga subjektet e kërkimit të naftës dhe të vënies në shfrytëzim të zonave naftëmbajtëse, pavarësisht nga destinacioni i përdorimit.”

Neni 2

Në nenin 41, pikat 7 dhe 8 ndryshohen si më poshtë:

“7. Me përjashtim të lëvizjes në transit dhe mbajtjes nën pezullim në magazinë fiskale stokimi, hedhja në konsum, blerja e mbajtja e produkteve të përmendura në pikën 1, të këtij neni, konsiderohen të paligjshme.

8. Pa cenuar dispozitat e këtij ligji dhe dispozitat e Kodit Doganor, të cilat u lejojnë importuesve privatë për të importuar mallra akcize për konsum personal, mallrat e akcizës të importuara, që duhet të pajisen me pullë akcize, sipas dispozitave të këtij ligji, duhet ta kenë pullën e akcizës të vendosur në çastin që importohen.

a) Përjashtohen nga përcaktimet e paragrafit të mësipërm rastet kur:

- i) këto mallra akcize futen në një magazinë fiskale stokimi;
- ii) lëvizin nën një regjim transiti nga zyra doganore e hyrjes drejt një zyre doganore tjetër brenda territorit, me destinacion futjen në një magazinë fiskale stokimi.
- b) Për rastet e përcaktuara në pikën 1 të këtij neni, pulla fiskale duhet të jetë e vendosur përkatësisht në momentin e hedhjes për konsum në dalje nga magazina fiskale e stokimit.
- c) Pajisja apo vendosja e pullës fiskale nuk mund të kryhet në një magazinë fiskale stokimi për produktet e importit, të parashikuara në shtojcën 1 të ligjit “Mallrat e tatueshme me akcizë në Republikën e Shqipërisë”, pjesa III, “Duhani dhe nënproduktet e tij”, përveç duhanit të grirë.
- ç) Operacionet e vendosjes së pullës fiskale në një magazinë fiskale stokimi kryhen nën mbikëqyrjen e autoriteteve doganore. Depozituesi i miratuar duhet të depozitojë një kërkesë me shkrim pranë Zyrës Doganore Mbikëqyrëse 48 orë përpara fillimit të vendosjes së pullave, për sigurimin e pranisë së autoriteteve doganore gjatë procesit të vendosjes së pullave. Procesi i vendosjes së pullave fiskale fillon pas sigurimit të prezencës së autoriteteve doganore. Në përfundim të procesit hartohet procesverbali përkatës, në të cilin pasqyrohen të gjitha të dhënat, në lidhje me pullat e vendosura, si dhe nënshkruhet nga përfaqësuesi i autoriteteve doganore dhe depozituesi i miratuar.
- d) Këshilli i Ministrave përcakton mekanizmat specifikë të kontrollit, elementët proceduralë të menaxhimit të pullave me koncesionarin apo prezencës së pullave fiskale të shteteve të tjera, ku do të bëhet eksporti apo distribucioni, procedurën e vendosjes së këtyre pullave të huaja me prezencë të doganës gjatë vendosjes, rakordimin e pullave të huaja, të cilat do të hyjnë me Regjimin e Lejimit të Përkohshëm në Shqipëri.”.

Neni 3

Në nenin 48, pas pikës 3 shtohet pika 4 me këtë përmbajtje:

“4. Për qëllime mbikëqyrjeje dhe kontrolli, autoritetet doganore i kërkojnë depozituesit të miratuar të instalojë/të vendosë sisteme mbikëqyrëse me video-kamera. Depozituesi i miratuar në këto raste siguron transmetimin dhe ruajtjen e pacenuar të imazheve të regjistruara nga sistemet mbikëqyrëse me video-kamera brenda afateve të përcaktuara nga autoritetet doganore. Në rast se ka filluar procedura hetimore/gjyqësore, këto imazhe ruhen deri në përfundim të procesit hetimor dhe/ose gjyqësor.”.

Neni 4

Në nenin 80, pas pikës 2 shtohet pika 3 me këtë përmbajtje:

“3. Nuk i nënshtrohet pagesës së akcizës duhani i prodhuar dhe i grirë apo i përpunuar nga individët privatë dhe i konsumuar nga vetë prodhuesit, nga familjarët, për përdorim vetjak, me kusht që të mos jetë objekt i asnjë veprimtarie shitjeje dhe sasia e prodhimit të mos jetë më e madhe se 25 kg në vit.”.

Neni 5

Në nenin 94, pika 1, pas shkronjës “b” shtohet shkronja “c” me këtë përmbajtje:

“c) Kur shkelja është verifikuar gjatë transportit, mjeti i transportit, në të cilin gjenden mallrat pa pullë akcize/fiskale, sekuestrohet nga autoritetet doganore e më pas mund të konfiskohet me vendim të gjykatës, në përputhje me përcaktimet e Kodit Penal dhe Kodit të Procedurës Penale. Mjeti i transportit përjashtohet nga sekuestroja kur provohet se pronari i tij nuk është përfshirë në shkeljen në fjalë.”.

Neni 6

Pas nenit 95 shtohen nenet 95/1 dhe 95/2 me këtë përmbajtje:

“Neni 95/1

Mbajtja, transportimi ose shitja e produkteve të akcizës pa shënjes/markues ose ngjyrues

Eksportimi, hedhja për konsum, mbajtja, tregtimi, transportimi i nënprodukteve të naftës që nuk përmbajnë markuesin/shënjesin ose ngjyruesin apo që nuk e kanë markuesin/shënjesin ose ngjyruesin në përqendrimin/koncentrimin e duhur, sanksionohet si më poshtë:

a) gjobë, për herën e parë të konstatuar, sa 2- fishi i detyrimeve fiskale që duhet të paguhet për të gjithë sasinë e produktit të pashënjuar/të pangjyrosur, të gjendur në depozitë/mbajtës, por në çdo rast jo më pak se 200 000 lekë; për herën e dytë të konstatuar, sa 3-fishi i detyrimeve fiskale që duhet të paguhet për të gjithë sasinë e produktit të pafiskalizuar, të gjendur në depozitë/mbajtës, por në çdo rast jo më pak se 500 000 lekë; dhe për herën e tretë të konstatuar dhe më pas, sa 5-fishi i detyrimeve fiskale që duhet të paguhet për të gjithë sasinë e produktit të pashënjuar/të pangjyrosur, të gjendur në depozitë/mbajtës, por në çdo rast jo më pak se 1 000 000 lekë;

b) përveç gjobës së parashikuar në shkronjën “a”, të këtij neni, njëkohësisht, konfiskohet e gjithë sasia e produktit të gjendur në depozitë/mbajtës.”.

Neni 95/2

Shkeljet për ndërhyrjet në shënjes ose ngjyrues

Vendosja (injektimi) i markuesve/shënjesve ose ngjyruesve të falsifikuar ose të manipuluar në mallrat e akcizës ose falsifikimi apo vjedhja e shënjesve/ngjyruesve, përveç ndjekjes penale, dënohen me gjobë, në masën 1 000 000 lekë.”.

Neni 7

Shtojca 1, që i bashkëlidhet ligjit nr. 61/2012, “Për akcizat në Republikën e Shqipërisë”, të ndryshuar, zëvendësohet me shtojcën me të njëjtin numër, që i bashkëlidhet këtij ligji.

Neni 8

Ky ligj botohet në Fletoren Zyrtare dhe hyn në fuqi në datën 1 janar 2016.

Miraturar në datën 17.12.2015

Shpallur me dekretin nr. 9400, datë 8.1.2015 të Presidentit të Republikës së Shqipërisë, Bujar Nishani

Botuar ne F.Zyrtare 244/2015

Dale nga shtypi me 11.01.2016